

TAFASWIRI AN-KIBUSHI NIM-MATEKELEZO KI DUNIA NIN-HAKI-L-ADAMÌ

ALUHA NIN-VUDIN'NI KURAŊA

An-fahitana amba, fikuḅaliṅa amba binadamu djabi nitirahinyi ndreka usheu ndreka haki merana nandzari ro musingi nin-nafasi, nin-haki ndreka usalama duniani ;

An-fahitana amba, tsifahizana ndreka fipuzisana haki-l-adamì ro mikutsonga faṅanovana shitrendro ki katili maneitri rohu nin-umati djabi, amin'ni zenyi, fitunga nin-ulemengu mbu kuruhusu binadamu ivulana ndreka ikwamini aminnafasi, bilà tahutru wala taābu nin-ufukara, ro nikutekelezana kirasimi, ustaāraḅu beheben-djabi ninhulumbelu ;

An-An- fahitana amba, aṅatin'ni sharia-musingi nin-ndreu, zanatani nin-Uvumoja nin-Twaifa (Shama nin-Daula nin-Ulemengu) nikutekeleza mara hafa uaminifu nin-ndreu amin'ni haki musingi nim-binadamu ; amin'ni usheu ndreka kima ninhulu an-rohuni, amin'ni fihirana nin-haki nin-lalahi ndreka viavi, amin'zenyi, reu nampahei amba reu nangala āzima ampadeha aluha faṅadzarisana maisha nimbinadamu ndreka ampiditri an-lalana raha mbu andei tanafu tsara am-maisha nin-nafasi nankitinyi nimbinadamu ; ahitana amba, nikulazimu natou nguvu fihavavana bainan'ni tani ndreka tani ;

An- fahitana amba, Daula Aṅatin-shama itì ndreka shama nin-Uvumoja nin-Twaifa (Shama nin-Daula nin-Ulemengu) nangala wahadi an-ndreu aṅaraka kabaru retu atà haki-ladamì ndreka nafasi musingi ikustehinyi nankitinyi amin'ni dunia mafia ;

An- fahitana amba, fikutrugana djumla nin-sharia ndreka nafasi retu nandzari muhimu swafi an-fikustehiana namuna kulazimu, wahadi itì ;

Trengwe djumla nampahei amba Matekelezo ki Dunia nin-Haki-l-Adamì itì

ro daradja aṅaḅaḅun-djabi nin-ustaāraḅu nikulazimu nahazu nin-kula karazana zanatani ndreka nishani, anga binadamu djabi ndreka kula karazana ninfikueshiṅandreu, ihisi Matekelezo itì daima amin'ni luhan-ndreu, aṅanu djitihadi amin'ni fampidzuruana ndreka fitarimiana, ampiasa masitaha nin-sharia ndreka nafasi retu ; amin'ni zenyi, aṅanu modeli ata, amin'ndreu maṅapiditri an-lalana moramora-moramora satua mifotutru tani ou mifotutru dunia, reu ikutsonga ata fikuḅaliṅa ndreka fikurumiana reu itì, ike nin-ankitinyi amin'ni dunia mafiha ; rangu amin'ni zanatani nin-Daula aṅatin'ni Uvumoja nin-Twaifa (Shama nin-Daula nin-Ulemengu) ata an-tani amin'ni hifadhwi ni sharian-ndreu.

Kanuni aluha

Binadamu djabi nitirahinyi an-nafasi, reu bokeu mirana amin'ni usheu ndreka haki. Reu teraka ndreka ākili ndreka hikima, amin'ni zenyi, reu nikulazimu nisi twerana nin-fihavavana reu sambu reu.

Kanuni faha aroini :

Kula hulungu meti mikudai fikurumiana amin'nazi ninsharia ndreka nafasi retu djabi, nivulavavana amin'ni Matekelezo itì, wala tsihi fifidavavana

tsokao yotsi, mfano mifotutru kabila, range (nin-nenyi), lalahi au viavi, fivulana, dini, fikira ki siasa au fikira hafa tu, tani nibwaha au daradjan-hulu, mali, teraka au kabaru hafa tu.

Boka eu, tsi uhisi fifidana tsokao yotsi mbu atou hatasibabun' ni daradja nin-siasa, nim-mahakama au hatasibabun'ni abezan-tani au gitro nin-tani nibwaha ninhulu ; neka tani iu au gitro nin-tani iu huru, nikutawalan'ni tani hafa, tsi mahaleu tega au nikupunguzana yezi.

Kanuni faha teluni :

Kula shumbe-binadamu misi haki an-fikueshiana, annafasi ndreka an-hifadhwi nin-nafusini.

Kanuni faha efatrani :

Tsisi hulu mbu atou andevu au andivuzana : fandivuzana ndreka kula kalite nin-fanyiraha ki andevu, tsi kuruhusu.

Kanuni faha dimini :

Tsisi hulu mbu atou matriko, wala fihezinyi ou kudilinyi kara raha tsisi manani ou atou raha mikulanisa izi.

Kanuni faha tshutani :

Kula hulu misi haki an-fikubaliana haki nazi kula mahala misi izi.

Kanuni faha fituni :

Hulu djabi mirana an-lalana ki sharia ndreka misi haki djabi bila fifidana, an-hifadhwi mirana nin-sharia. Hulu djabi misi haki mirana an-sharia mikuhifadhwi hulu ndreka kula ubanguzi mandeha kinyume ndreka Matekelezo iti, ndreka kula fikutsotsana ubanguzi iti.

Kanuni faha valuni :

Kula hulu misi haki an-fandihanana mikushitaki ammahakama nin-tani misi maarifa amin'ni kabaru nazi, neka haki-musingi nazi, boka eu nikubalin'ni sharia be musingi ou sharia tu, tsi nikusutehinyi.

Kanuni faha sivini :

Tsisi hulu mbu heti tanin-sirikali ou gadrani lajoli ou atuwatanini bila sibabu.

Kanuni faha fuluni :

Kula hulu misi haki, an-fihirana swafi, an-fananovani modeli ata hadja nazi urenyim-mahakama tsi kisirikali, tsi mampinonu hila, an-lalana nin-haki ndreka anyivunntrengwe. Mahakama iti ro mbu ahei neka hulu iti amin'ni haki nazi ndreka farudhwi nazi au mashitaka natoa izi iti manaraka lalana.

Kanuni faha fulu areki ambini :

Kula hulu nikuhutumungu ndreka tabia ratsi, kaza taninyi ndreka

halathwi paka izi kuhukumungu kirasimi am-mahakama mbianga an-trengwe, amin'izi eu, kula kabaru miditri amin'ni difäi nazi djabi nikurumiananga.

Tsisi hulungu mbu vangonga kubei hatasibaŋun'ni ämali au raha tsi nishugulinyi, ndreka wakati nananovanga reu itì, reu tsi nalanga amba tabia ratsi amin'ni sharia nin-tani au nin-ulemengu. Boka eu kua, tsisi raha rati mandiltra inyi fa vua hulungu lera nananovanga tabia rati retu, mbu vua hulungu kua.

Kanuni faha fulu aroi ambini :

Tsisi hulungu mbu hidiranga bila sibabu, am-maisha ninantanana nazi, amin'ni havanga nazi, amin'ni trangu nazi au amin'ni barua nazi ; wala tsisi hulungu mbu hiditri amin'ni kabaru mbu ikupua hulungu usheu, mbu andatsaka izi. Kula hulungu misi haki an-hifadhwi ninsharia mamahanga fidiranga an-hulungu ndreka fikufutsuhanga maisha nin-hulungu.

Kanuni faha fulu telu ambini :

Kula hulungu misi haki an-fidiranga ndreka fibwahanga an-nafasi ndreka an-fifidananga mahala ipitrahani anatin'ni Daula .

Kula hulungu misi haki an-fibwahani an-nakwakila tani, ata an-tani nazi, ndreka an-fipudiani an-tani nazi.

Kanuni faha fulu efatra ambini :

Am-mahala misi udilifu, kula hulungu misi ruhusa mitsakaraka mahala ififianga, boka eu, misi furswa ahazu mahala ififiani amin'ni tani hafa.

Sharia iti tsi heti kurumiananga neka hulungu mila ikurumiananga izi itì, tsakarahin'ni sirikali hatasibaŋun'ni shidrendro natoni niditri amin'ni baadhwi nin-shidrendro nikudukuruŋu amin'ni sharia djumla au hatasibaŋun'ni tabia natoni tsi miaraka ndreka madhumuni ndreka makuswada nin-Uvumoja nin-Twaifa (Shama nin-Daula nin-Ulemengu).

Kanuni faha fulu dimi ambini :

Kula hulungu misi haki an-fazahuanga uraia.

Tsisi hulungu mbu heti fahangana kaza ahazu uraia au amadiki uraia, bila sibabu.

Kanuni faha fulu tshuta ambini :

Neka reu fa kutsimu, lalahi ndreka viavi nin-kula nishani, kula uraia au kula dini, meti manambadi ndreka miteraka zanakan-ndreu. Hakin-ndreu amin'ni kabaru mifotutru vadianga meranga, lera reu amin'ni vadianga ndreka lera reu mibonju.

Vadianga mbu heti atou neka bwana harusì ndreka bweni harusì nikuŋali izi itì.

Fihisianga havanga iu raha amin'ni vatan-hulungu boka eu muhimu amin'ni maisha ki udjamaa ; izi itì misi furswa ahazu hifadhwi nin-udjamaa ndreka nin-Daula.

Kanuni faha fulu fitu ambini :

Kula hulugu, rangu inyi mipetraka izi areki ata inyi mipetraka an-djamaã, misi furswa amba izi hu tompinshandza.

Tsisi hulugu mbu heti fahagana bilà sibabu amba izi kaza utompinshandza.

Kanuni faha fulu valu ambini :

Kula hulugu misi haki an-fihisianga nafasi nin-fikufikirianga, nin-fikurumianaã ãkili-musingi ndreka nin-fihisianga dini ; haki itì mikuruhusu hulugu mamadiki dini au fikira, ndreka manamia hulugu nafasi mampahei dini au fikira nazi izi areki au ndreka ri namani rangi an-karamandza ata an-traŋuni ; amin'ni fidzuruanga izi, amin'ni faŋanovanga izi, amin'ni faŋanovanga ãbada ndreka mahafala mifotrutu dini itì.

Kanuni faha fulu sivi ambini :

Kula hulugu misi haki an-fihisianga nafasi ninfaŋabwahanga fikira ndreka nin-fivulana ; maãnani iu, hulugu misi haki an-tsifiampidzalianga hulugu hatasibabu nin-fikira nazi ; an-fahazuanga ndreka faŋabuŋuanga bila tsisi fikutundanga mupaka, kabaru ndreka fikira, an-kula lalanga mbu kurumianaã.

Kanuni faha aropuluni :

Kula hulugu misi haki an-fihisianga nafasi nin-fivurianga ndreka nin-faŋanovanga shama tsisi tashahushi.

Tsisi hulugu mbu atou nguvu ihiditri an-shama.

Kanuni faha aropulu areki ambini :

Kula hulugu misi haki an-fangalanga fuvu anfaŋandesanga kabaru mifotutru hulugu djabi an-tani nazi, nahika ro hulugu tompini au amin'ni hulugu maŋatitri wakala nifidanaã an-nafasi.

Kula hulugu misi haki an-fihisianga lalanga, mikustehi masharutwi nin-fihiranga, iditri an-hasa ki sirikali nin-tani nazi.

Nia nin-zanatani io ro musingi nin-yezi nin-sirikali ; nia itì nikulazimu kutekelezanga amin'ni voti mazava nikulazimu natou kula mumba muda, amin'ni lalanga mikukarbisa hulugu djabi an-fihirana, amin'ni voti ninsiri au maŋaraka fomba miranga ndreka voti nin-siri, mikuruhusu unafasi nin-voti.

Kanuni faha aropulu aroi ambini :

Kula hulugu, amin'izi hulugu nin-djamaã, misi haki anfazahua hifadhwi ki fihavagana (ki siraki) ; musingi nin-hifadhwi iu, ro fikutsimidzanga haki mifotutru ãkiba, udjamaã ndreka utamaduni muhimu an-hishima nazi ndreka an-huvambufu an-nafasi nin-twera, hatasibabun'ni djitihadi ki tani ndreka fishirika ki ulemengu, hatasibabun'ni namuna nin-kupanga ndreka rasulimali nin-kula tani.

Kanuni faha aropulu telu ambini :

Kula hulugu misi haki an-fazahuani hasa ndreka anfihisiani shabaha an-fifidanani hasa amin'ni lalaga ninhaki bokeu kusutou nin-hasa ; ndreka misi haki anfikuhafadhwiana izi ndreka fipitrahaga-bure.

Hulugu djabi, wala tsisi fifidanaga, misi haki anfazahuaga mushahara meraga an-faganovaga hasa miraga.

Kula hulugu miasa, misi haki an-fazahuaga mushahara kusutou, modeli nikulazimu mbu ikuruhusu izi ndreka ri havani uhisi maisha ki ubinadamu, bokeu meti susohinyi ndreka musada hafa nin-hifadhwi ki udjamaa.

Kula hulugu misi haki an-fikupangana ndreki ri havani, shama nin-fikudaiaga haki nin-hulugu nin-hasa, an-fihidirani an-shama mikudifaï tanafu nazi.

Kanuni faha aropulu efatra ambini :

Kula hulugu misi haki an-fagabwahaga vaha ndreka fangalaga nafasi, amin'ni zenyi, an-faganovaga mupaka mikustahiki amin'ni muda nin-hasa ndreka anfangabwahaga vaha ifaga nim-muda.

Kanuni faha aropulu dimi ambini :

Kula hulugu misi haki an-fihisiaga daradja ninfikueshiaga kiasi, mikuruhusu izi uhisi swiha tsara, ahazu faivagana, izi ndreka ri havaga nazi, an-kabaru mifoturu, fihinanaga, fisikinaga, fihisiaga tragu, fazahuaga audi ki lopitali ndreka fazahuan-hulugu zema ki sirikali muhimu : izi misi haki an-fazahuani musada anwakati nin-fipitrahaga-bure, nin-aretinyi, ninfikupunguzan'ni ziga, nin-fati nin-vadi, ninhaubakokuaga, au am-mukabala nin-fihafahan-raha mampahazu hulugu maisha, hatasibabu nin-fandihana nin-kabaru bila uvhendza nazi.

Fitirahaga ndreka hauzazaga misi haki an-fazahuaga musada ndreka fikututubiana mahususy. Zaza djabi, rangu reu nitirahinyi an-vadiana ata reu nitirahinyi antani, misi haki miraga an-fazahuaga hifadhwi nin-taãbu nim-maisha.

Kanuni faha aropulu tshuta ambini :

Kula hulugu misi haki an-fidzuruaga. Fidzuruaga nikulazimu bure, shingani ro, fidzuruaga an-likoli madiniki. Fidzuruaga hasan-tagana nikulazimu mibiaga an-hulugu djabi ; fidiraga an-likoli nin-daradja agabu ninfidzuruaga nikulazimu nibiaga an-fihiraga nin-ankitinyi, an-kula hulugu djabi misi maarifa uhiditri.

Fidzuruaga nikulazimu nikusudia utsatsarufu nimbinadamu, faganovaga nguvu mastaha nin-haki-l-adami ndreka nafasi musingi. Izi tihî nikulazimu nampandehaaluha fikuelewaga, muswamaha ndreka fiwandzaniaga nin-tani djabi, ndreka shikao nin-kabila au nin-dini ndreka fandihanaga-aluha nin-ãmali nin-Uvumoja nin Twaifa (Shama nin-Daula nin-Ulemengu) fikututubiana usalama.

Ri hulugu maventi nin-hulugu, misi haki an-fifidanaga amin'ni raha muhimu amin'ndreu, fidzuruaga tokutru ahazun-ndri zanakan-ndreu.

Kanuni faha aropulu fitu ambini :

Kula hulungu misi haki an-fangalana fuvu neka izi shoku, am-maisha ki tamaduni nin-djamaa, an-fangalana bastwi nin-swanaa ndreka an-fangalana bandza amin'ni fandihanana-aluha nin-sayasi ndreka atsarana ahazungu an-raha retu.

Kula hulungu misi haki an-fikuafadhwianga zavatra nazi, rangu reu mifotutru ilimu ata zombo nikumbana anfikurumianana sayasi, fanuratana buku au fikutrungana kabaru, neka izi ro tompin'ni raha retu.

Kanuni faha aropulu valu ambini :

Kula hulungu misi haki an-faganovana modeli ata utrilivu amin'ni maisha ki binadamu ndreka amin'ni ulemengu ikuhala ata haki ndreka unafasi nikudukurungu agatim- Matekelezo iti, ikurumianana namuna nin-kulazimu.

Kanuni faha aropulu sivi ambini :

Binadamu misi raha diasinyi ndreka izi amin'ni djamaa nazi ; amin'izi iti, fikuvambusan'ni twerana nazi an-nafasi, iu tu ro raha isiani ruhusa mananu azi.

Amin'ni fikurumianana hakin-hulungu, ndreka fihisianhulungu nafasi, raha retu djabi misi mupaka napetrakansharia. Makuswada nim-mupaka retu, izi ro faganovana modeli ata fikuhaliana ndreka mastaha nin-haki ndreka nafasi nin-havana ikueshi ; amin'ni fikusutehiana kua, masharutwi nin-ubinadamu, nin-utrulivu nin-trengwe ndreka fiatsarana djumla nin-djamaa nin-ki nafasi.

Haki ndreka nafasi retu, ala-kulli-hali, tsi uheti ikurumianana amin'ni lalana tsi miaraka ndreka makswada ndreka masharutwi nin-Uvumoja nin-Twaifa (Shama nin-Daula nin-Ulemengu).

Kanuni faha telumpuluni :

Tsisi ata sharia areki nim-Matekelezo iti mbu heti kutafaswirinyi amin'ni lalana mikuruhusu, Daula, shikao au hulungu areki, ihisi haki itsokao yotsi nin-faganovana mahafala au amali mandrubaka haki ndreka unafasi nikudukurungu etu.